

Tarnikkut atugarliorneq aammalu imminut toqunnissamut ernumanartoqarneq akiorniarlugit innuttaasut tarnikkut ikiueqqaarsinnaanissamut pikkorissarfissaannik periarfissiisoqarnissaanut suliniutissatut pilersaarutininik Naalakkersuisut suliaqarnissaat pillugu Inatsisartut aalajangiiffigisassaattut siunnersut.

Sammisami attuumassuteqartut, uanilu immikkut piffinni ingerlatsisut kommuunillu suleqatigineqarnissaat Naalakkersuisunit annertuumik anguniarneqassaaq. Periusissiatut pilersaarutit kingusinnerpaamik 1. juni 2023 piareereersimassapput.
(Inatsisartunut Ilaasortaq Anna Wangenheim, Demokraatit)

Akissuteqaat

(Meeqqanut, Inuusuttunut Ilaqutariinnullu Naalakkersuisoq)

Siullermeerneqarnera

Tarnikkut atugarliorneq imminullu toquttarneq akiorniarlugit iliuuseqarnissaq pillugu oqallinnermut pingaarutilimmut aalajangiiffigisassatut siunnersuummik tapersiisumik siunnersuuteqartumut Anna Wangenheimimut, Demokraatit, qujanaq.

Tarnikkut atugarliorneq imminullu toquttarneq nunatta ilaatigut annertunerpaamik unammilligassarigai isertugaataangilaq. Tarnip pissusaanik ilisimasalinnik atorfinitsisiniarneq unammilligassaasoq isertugaataangilaq. Tamanna illoqarfinni nunaqarfinnilu atuuppoq. Tarnip pissusaanik ilisimasalinnik amigaateqarneq illoqarfinni minnerni nunaqarfinnilu annertuumik immikkut sunnerneqarsimapput.

Sumiiffinni minnerni inuiaqatigiinnermi ataqatigiilluartoqarpoq. Tamaani kikkut tamarmik imminnut ikioqatigiittarput meerartatillu aamma inuusuttortatik ataatsimoorlutik isumagisarpaat. Meeqqat inuusuttullu ilaqutariippassuarni ilaagajuttarput. Angajoqqaaginnaangillat kisianni aamma aanaakkoqarpoq, illooqqakkut, angaakkut ajakkullu meeqqamut inuusuttumullu isumassuineramik qanimut aamma tuniseqataasartunik.

Sumiiffinni inuiaqatigiinni ataqatigiilluarfiusumi arlaat tarnikkut atugarlioraangat ikioqatigiittarnermut tarnikkut ikiueqqaarnermik pikkorissarneq ikorfartuutaasinnaavoq. Tarnip pissusaanik ilisimasalinnik amigaateqarneq isigissagaanni tamanna aamma pingaaruteqarpoq. Innuttaasut imminnut ikioqatigiikkusuttut Naalakkersuisuusugut upparaarput. Kisiannili tarnikkut atugarliorneq imminullu toqunnissamik eqqarsaateqarnerit pineqartillugit qanoq iliuuseqarnissaq ilisimassallugu nalunarsinnaavoq.

Tassunga atatillugu puigunngisassatsinnik inuiaqatigiinni innuttaasut inuiaqatigiinnilu suliniaqatigiiffiit isumalluutaapput annertuut. Inuiaqatigiinni suliniaqatigiiffiit pikkorissaanernik ineriartortitsineramik aamma tarnikkut ikiueqqaarneq pillugu pikkorissartitsinermik ingerlatsineramik ilapittuuteqarsinnaapput.

Tarnikkut ikiueqqaarnermi ilitersuisunut pikkorissaanissamik Kalaallit Røde Korsiaata neqerooruteqartarneranik misilittagaqarfigisaa atussallugu pissusissamisoorpoq. Inunnut allanut aliasunnermik, uippakajaarnermik pisunillu pinartunik eqqugaasunut ilitersuisutut atuuffeqalersinnaanissaanut, pikkorissarnerit taakku ilitersuisunngortussanut ilisimasanik, piginnaasanik isummanillu tunisissapput. Tassani pikkorissartup nammineq misigisimasai aallaavigalugit oqaloqatigiinnerit ajornakusoortut ilaatigut qitiutinneqarput.

Taamaattorli tarnikkut ikiueqqaarnermik pikkorissarnerit neqeroorutit innuttaasunut sammititat, pisortat meeqqanut inuusuttunullu tarnikkut atugarliortunut akisussaaffii neqeroorutinit taarserneqarsinnaanngitsut erseqqissassallugu pingaaruteqarpoq. Kommunit Namminersorlutillu Oqartussat neqeroorutaannut pikkorissarnerit taakku tapertatut isigineqassapput, taakkulu tarnip pissusaanik ilisimasalinnit tarnikkullu napparsimasunik katsorsaasunit ilinniarsimasunit ingerlanneqartassapput. Imminut toquttarneq akiorniarlugu Naalackersuisut periusissiuleruttorput, upernaq 2023-mi saqqummerumaarpoq. Inunnt imminut toqunnissamik navianartorsiortunut kisianni aamma qanigisaasunut qimataasimasunullu ikiuinissamat pilersitsiniarnermik periusissaq una immikkut qitiutitsivoq.

Oqaatigineqartut tunngavigalugit aalajangiussaq akuerineqassasoq inassutigineqarpoq.